

NERE LUR MAITEARI.

Euskal erri maiteak
 Batera arren bildu
 Eta ume zur onak
 Lurrera azaldu;
 Auzarkiz aurrera
 Danok jua beagu
 Seme leial onak
 Baldin bagera gu.

¿Zeñek lege oik jarri
 Dizkigute guri?
 Galde zaigun gure
 Etsai gaistoari.
 Aita zarrak guriak
 Balirake bizi
 Seguru naiz esango,
 Lutekela ori.

Oroitzen naizenean
 Umiltasuna ¡bai!...
 Oraindik umillago
 Erdaldunak gu nai,
 Erregututzen diot
 Jaun aundi danari
 Lengo legeak arren
 Emateko guri.

Ain maite det lur au nik
 Biotz biotztikan
 Ez deritzat, ez, dala
 Inon oberikan,
 Zer nai gauza egingo det
 Nik zuregatikan
 Nola ama onak bere
 Umiagatikan

Nola oroi lezake
 Gure lur maiteak
 Bear dirala artu
 Onela nekeak;
 Anaiak len bai len, bai
 Bat egin gaitean,
 Ordaintzeko euskara
 Gu bildu gaitean.

Nik esaten dedan au
 Ez alda onela?
 Etzait iruritutzen
 Danikan bestela.
 Munduban beste asko
 Diraden bezala,
 Ara zureztat seme
 Bat guztiz leiala.

JOSÉ ZAPIRAIN ETA IRASTORZA.